



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 7

Nüburtemi PM tazungba jenjang metettsü tim masü no?: Kejriwal

New York nung Trump dak tai tongloktsüogo



VOL. XX NO. 169 (ADOK 169) DIMAPUR KÜPTOKNÜ (SATURDAY) RONGCHII (APRIL) 01, 2023 ₹ 5.00

Rs 1,998.63 crore agi Nagaland GSDP teimba aküm

Kohima, March 31, 2023 (TYO): 2021-22 financial year nung Nagaland indang Gross State Domestic Product (GSDP)Rs 1,998.63 crore (6.57%) agi teimba aküm ta Comptroller and Auditor General (CAG) of India-i ashi.

March 31, 2022 nung tembangba financial year indang State Finances report nung CAG-i ashiba agi "tesüiba küm 5 tsüingda GSDP teimba akümba sayur. 2017-18 nung Rs 24,392.96 crore liasü, 2020-21 nung Rs 30,425.11 crore aser 2021-22 nung Rs 32,423.74 crore liasü."

Ajisüaka, 2021-22 nung Nagaland atema GSDP (6.57%) ji all India GDP (16.85%) dang nungi tajemba liasü ta CAG-i metetdaksü.

GSDP teimba akümba nung Service Sector-i shilem tuluba (59.67%) agi. Parnok sülen Agriculture Sector 26.81%, Industry Sector 11.21% aser Taxes o Subsidies liasü. 2021-22

nung Nagaland-i Rs 1,634.06 crore talila bendentet aser ibaji GSDP indang 5.04% liasü.

2021-22 financial year nung Nagaland-i Rs 1,634.06 crore Revenue surplus angu aser ibaji GSDP indang 5.04% liasü.

Sorkari Fiscal Responsibility and Budget Management (FRBM) Act nung ashiba ama Revenue Surplus takok ngua inyakogo aser Act kübok lateta aliba ama Fiscal Deficit-GSDP ratio aser Outstanding Debt-GSDP ratio shitak dang liasü, ta CAG-isa metetdaksü.

State sorkari State Goods and Services Tax dak alia 2021-22 nung Own Tax Revenue collection inyakym ama maneni inyaktsüla aser iba ajanga Own Tax Revenue teimba akümsü, ta CAG-i metetdaksü.

Nagaland state sorkari Nagaland FRBM Act nung yanglua aliba ama tarutsü nung maneni deficit aser debt telatetba atongtsü atema merangtsüla, ta parnokisa ashi.

NTC-i Nagaland sorkar nem tenüngsang agütsür

Dimapur, March 31, 2023 (TYO): Nagaland Legislative Assembly 2023-i Nagaland Municipal Act 2001 ajanga agientsü lemtetba bangzüng pelashishia agizüker ta Nagaland Tribes Council (NTC)-i metetdaksüogo.

Nagaland nung tongti kin hohotem aser civil society teloktemi NMA 2001 nung metokmeperi alibatem ashiba sorkari süoki ia agizükba atema pelar, ta NTC-i ashi.

NM Act 2001 agienba ajanga

Indian Constitution nung Arrla 371A kümzüka yuogo aser iba ajanga tarutsü anogotem Nagaland nung Municipal & Town Councils timi ketdangtsü otettsü, ta Media Cell, NTC-i sangdong ka nung ashi.

State sorkari sendaktepa alir ajak den asüngdangtepa Nagaland Municipal Act yanglutsüla. NMA nung tashishitsü malitsüla, Arrla 371A nung mekongshitsüla aser Nagaland den putepa yanglutsüla, ta NTC-i metetdaksü.

Kohima nung odd-even scheme tenzüksü

Dimapur, March 31, 2023 (TYO): G-20 Summit alitsü atema April 4 & 5, 2023 anogotem Kohima nung odd-even scheme tenzüksü, ta Kohima Deputy Commissioner, Shanavas IAS-i ashi.

Anogo ananü anepdang 6:00 ako nungi nikongdang 9:00 ako tashi commercial vehicles (two & four-wheeler taxis, pick-ups/ Tata Mobile, Buses) odd-even nung senzütsü. Tashi mangartem Motor Vehicle Amendment Act 2019 nung section 179 kübok temerenshi alitsü ta paisa metetdaksü.

April 4, 2023 odd digit (1,3,5,7,9) agi tembangba garitem senzütsü.

April 5, 2023 even digit (2,4,6,8,0) agi tembangba garitem senzütsü.

Dimapur Police-i traffic

tetuyuba agütsür

Kohima nung April 5, 2023 nü G-20 business meet atema Dy. Commissioner of Police (Crime)/PRO Dimapur-i traffic tetuyuba kar agütsüogo.

April 4, 2023 nü gari senzüba noktangtsü aser anüngdang 12:00 ako nungi nikongdang 3:00 ako tashi 3rd Mile junction nungi Patkai Bridge tashi lenmang tezülen garitem anena mayutsü.

April 6, 2023 anepdang 11:00 ako nungi nikongdang 2:00 ako tashi Patkai Bridge nungi 3rd Mile junction tashi garitem anena mayutsü.

Item anogotem dokan kiburtem aser public-i pei pei garitem lenmang nung anena mayutsü nenshia metetdaksür ta Dy. Commissioner of Police (Crime)/PRO, Dimapur-isa ashi.

CM Rio-i Chairmen/Advisors nem appointment letters agütsü



March 31, 2023 nü Chief Minister's Office, Kohima nung Chief Minister Neiphu Rio aser Chairmen/Advisors tasentem külemi agiba noksa ka angur.

Dimapur, March 31, 2023 (TYO): Chief Minister Neiphu Rio-i March 31, 2023 nü Chairmen/Advisors 11 nem appointment letters agütsüogo.

Tanü CM Rio-i Advisor to Chief Minister Dr. Chumben Murry; Advisor to Chief Minister & Chairman, IDAN Abu Metha, Advisor to Chief Minister & Chairman, NKVIB Dr. Neiphrezo Keditsu, Chairman, DAN, Dr. Watizulu Jamir, Chairman, NHL, Thongwang Konyak, Chairman, NSMDC Kuputo Shohe, Chairman, MARCOFED, Dr. M. Chuba Ao, Chairman, Honey

Mission Obed Quinker; Chairman, Bio-Resource Mission Wanpong Konyak; Chairman NEPED Supongmeren Hoki aser Chairman, TaFMA Theja Meru nung nem appointment letters agütsü.

Chairmen/Advisors-i telok ka ama külemi longjemer inyaktsü aser tensa ajak nung yariteptsü mepishir, ta pai ashi.

"Nübertem tenzüksüba ya maongka ka lir saka iba nung tebilemstü khuret aika dena lir. Anungji nenoki item tebilemstütem temulung nung yur inyaktsü ayongzüker" ta CM

Rio-i ashi.

Iba sentong nung Advisor to Chief Minister & Chairman, IDAN Abu Metha-i Chief Minister dang parnok nem mapa lemsüktsüba atema pelaba metetdaksü.

"Item maongka ya nisung kari dang angur aser iba ajanga asenoki tali meranga inyaktsü ajungmesor. Neiphu Rio lenisüba kübok Nagaland tejakleni aoer" ta Metha-isa ashi.

Iba sentong ya Chief Minister's Office, Kohima nung agi aser Principal Secretary, AbhijitSinha, IAS menden liasü.

Nagaland sorkari budget masadangi yanglur; sen tim mesüi amshir

Kohima, March 31, 2023 (TYO): Nagaland sorkari budget meshisadangi yanglur aser kuli tejanga makai supplementary grants/ appropriations meshia agir ta tai tongloktsüogo.

Comptroller and Auditor General (CAG) of India-i March 31, 2022 nung tembangba financial year indang report agütsüba nung Nagaland State Legislature-i Rs 25,644.46 crore (original: Rs 22,816.61 crore plus Supplementary: Rs 2,827.84 crore) budget agizük aser Department temi Rs 21,690.85 crore endoker Rs 3,953.61 crore (budget nung 15.42%) anüngzüük ta shia lir.

Iba ajanga Rs 2,827.84 crore Supplementary Grant nungdak madoker kechiyong gross expenditure ji Rs 1,125.76 crore liasü ta CAG-i ashi.

March 22, 2022 nung Supplementary Grant agi aser February 2022 tashi nung total expenditure ji Rs 18,504.22 crore liasü. Iba ya Treasuries ajanga monthly civil accounts agütsüba nung ajemdaker lir aser tanüngba anogo 31 atema state sorkar ket nung Rs 4,312.39

crore anünga yutsü.

Supplementary Grant dena state sorkar ket nung Rs 7,140.23 crore liasü. Iba ajanga sorkari estimate talila yangluba aser senotsü tim mesüi amshiba sayur ta CAG-i metetdaksü.

Iba financial year nung budget nung maliba Rs 35 lakh endok aser iba ya financial regulations alema inyakba dang masü saka state assembly temulungtetba anema lir, ta parnokisa ashi.

Kuli tejanga makai Supplementary Grants/ Appropriations agizük aser budget nung lemsükba ama mesüi senotsü amshi ta CAG-isa ashi.

Tesüiba küm aika iba onük atema jembia aruaka state sorkari memetongshi, ta parnokisa shisem.

State sorkari Rs 3,953.61 crore anüngzüükba sayur aser iba ya Grants/ Appropriations indang 15% aser sen endokba indang 18% lir. Ajisüaka sen anüngzüük ta asübaji tezüluba nung dang ashi teka nungbo sen maliasü ta CAG report nung shia lir.

2021-22 financial year atemang Rs 213.95 crore talila

endokba liasü. Iba ya year 2017-18 nungi 2020-21 tsüingda Grants 22 kübok liasü aser iba ya Constitution of India indang Arrla 205 nung aliba ama regularization asütsü nungdaker, ta CAG-isa metetdaksü.

Higher Education Department ajanga senotsü endokba meyipa reprangshidang sen kanga anüngzüüksü merangba, osang kecha mali sen belenshiba aser meyipa agütsüba aika aliba ajitetogo ta CAG-isa ashi.

Sen talila endokba department tem jangjatsüla aser parnoki sen endokba nung tenük yoktsüla aser mapang shitak nung supplementary grants/ re-appropriations meshitsü ashitsüla, ta CAG-isa ashi.

Finance Department-i jungjunga reprangdangba aser department tem nungdakba asadanga sülen ang supplementary grants agütsütsüla. Iba ajanga department temi sen amshiba nung kümdangtsü aser assembly nungi temelaba meshir ang sen talila amshitsüla, ta CAG-isa metetdaksüogo.

Tuli nung A.Pangjung Jamir, MLA Tenüngsang agütsüba sentong agi



Tuli, March 31 (TYO) : Tuli Assembly Constituency nungi tawa agiba election nung adoksang MLA aser Advisor, Fisheries & Aquatic Resources, Wb.A.Pangjung Jamiri Tsüngrem aser nübertem nem tenüngsang agütsüba sentong ka yangi Public ground, Shitikolak ward, Tuli nung tanü Rogonü agiogo.

Iba sentong nung jembidang, Wb.A.Pangjung Jamiri tawa agiba election nung timtem lendong ajak nungi kümzüka aniba asoshi Tsüngrem nem tenüngsang agütsü aser nübertemi takok angutsüsa yariba atema pelaba metetdaksü. Paisa nübertem rongnung kar danga election mapang temulung yirudakja lira,

item ajakji amadoker Tuli aser temeket nung terenlok mapa tajung inyaka otettsü atema külemi longjemer shisalemsatepa inyaka aotsü ayongzük. Iba sentong nung Tuli Assembly Constituency kübok yimtsüng aser town-tem nungi lenirtemi anir nübertem aika arua shilem agia denogo.

Sharingain Longkumer-i tenüngsang agütsüba sentong ayongzük

Ungma, Metsüremi/March 31 (TYO): 26 Aonglenden Assembly Constituency nungi adoksang Nagaland Legislative Assembly (NLA), Speaker, Sharingain Longkumer-i nübur dang temoa ta ashiba tenüngsang agütsüba sentong ka tanü 31st March, 2023 nü Ungma yimdak Yimtsüngta Arok Sabang nung ayongzüka kaogo.

Taoba mapang asen tsüraburtemi par tendak junga inyakogo, yamaji paia tanü tensa den apet inyaksü merangsü aser teinyaksü wadang aika lir, anungji, nübu, shisatsü den sarasadem agi maneni yaridakdaksünür, ta pai constituency sanger dang mepishia ashi.

item ajak nungji pai anir party tenzükertemi yimden yimsüsür aser nüburtem nungi shisatsü meshia inyaksü pai ayongzük. Iba senden nung 26 A/C NDPP, General Secretary (Admin) - M Sütsüng Jamir menden liasü. 26 A/C President - Nungsangmeren Lkr-i tarur pelaa agizükba o jemi. Iba den NDPP Mokokchung Region, 26 A/C BJP Mandal, Ungma Yimden, Dilong Yimden, Sangtemla Yimden, Arkong Yimden, Marepkong Yimden, Kúpza Yimden aser Settsü Yimden nungi ketdangpur aser yimsüsürtemi shilem agia o tatsütsü jembia liasü. 26 A/C Vice President - Lipoktemsü Imsongi tepela o lemsatep.

Pai tanü iba sentong nung jembidang, election mapang 26 Aonglenden A/C kübok yimtsüng balalai yim süngküm lapoktsüba den ward balala nung nübu ayimtsü atema lenmang sadema lapoktsüba, aser yimsüsür akhüm nung nübur teyaritep ajanga pa adoktsüba asoshi pelaba metetdaksü.

Nagaland Municipal Act 2001 ya asenoki yanglu saka asenoki meshisadangi yangluba ajanga tanü ibaji magitsüsa kumatok. Aji oda, iba Act nüburi aginütsüsa tobur junga yanglutsü ajaki bilema alitsü paisa shisem. Ita ishika lir MP election arutsü aser asen jakdang delimitation keno anüngdaka lir,

NCC inyaksangshi nung 'Best College' sempet FAC, Mokokchung nem agütsü

Dimapur, Metsüremi/March 31 (TYO): NCC inyaksangshi nung Fazl Ali College, Mokokchung ya tajungtiba liasü aser 25 Naga Bn NCC kübok college 17 rongnung Training Year 2022-23 mapang 'Best College' shimteta liasü.

Wing (Girls) NCC cadets temi alakteta shilem agiogo. Cadets tem ya Puneet Sagar Abhyan (ayong aser tzi mürekba), Har Ghar Tiranga, tsürabor maliba tanurtem yariba, süngdong atemba, Yoga Day ama nübur ajungtsü aser linük meimba sentongtem nunga yakpang sür inyaka aru. (Maneni tapak 8 nung...)

College indang Senior Division (Boys) aser Senior



Mongsenyimti yimdak March 31, 2023 nü Advisor, Water Resources, Government of Nagaland, Tongpang Ozukum-i tenüngsang agütsüba sentong nung jembidang tangokba noksa nung angur.

Raj Bhavan nung ketdangsürtem den tepila sentong agi

Dimapur, Metsüremi/March 31 (TYO): Commissioner & Secretary to Governor of Nagaland, Wezope Kenye, IAS aser Officer on Special Duty, Jessy G Abraham den tepila sentong ka Nagaland Governor, La Ganesan-i March 31, 2023 nü Raj Bhavan, Kohima nung ayongzüka liasü.

Governor-i ashi. Pai mapa nungi anisüngzüka pela aser anema alitsü moatsü aser Commissioner & Secretary menden yutsür osang Wezope Kenye ajanga Raj Bhavan nung shilem tulu agiba asoshi tenüngsang agütsü aser maneni tajungtiba nung nübur tenzüksü imlaba lemsatepa liasü.

Iba sentong nung o tatsüka jembidang, mapa nungi anisüngzüka ya takum nung 'chapter' ka dang lir aser iba sülen ano takum liyonga aotsü tensa aser maongka aika lir, ta

Kasa anogo Ura Bhavan Conference Hall, Raj Bhavan nung Staff Welfare Society of Raj Bhavan Kohima ajanga tena asoshi tepila sentong ka ayongzüka liasü.



Arishi küm 96 tain Ongkiyala-i International Evangelical Fellowship nem sen tenla agütsüba noksa nung angur. Lai tesem balala nung oa Tsüngrem osang tajung meporoktetaka lai tenla agütsüba yagi karbo yaritsü. Lai Ungma bus ajanga Public Ground, Mokokchung anasa aliba IAF Office bushia oa küm nung asemben tenla agütsür. Lai tenük aina (spectacle) medeni Laishiba aser kakat balala züngteter.

Ao Kaketshir Telungjem Dimapur meyong ki semzükogo

Dimapur, Metsüremi/March 31 (TYO): Ao Kaketshir Telungjem Dimapur (AKTD) meyong Dimapur kübok Signal Angami village nung yangluba ki ka tanü, March 31, 2023 nikongdang 3:00 ako nung semzükogo liasü.

iba ki renem aser iba indang osang tejangja AKTD Inti Mungdang nung agütsütsü, ta ashi. Sentong nung tayongzükba o jembidang, Tsüngrem tashi agi iba mapa asangsang kumdaktsüogo, ta Ao Senso Telungjem Dimapur tir, Meren Longchar-i ashi.

1993 küm December 8 nü Dimapur Town Hall nung AKTD küm 25 ajungba jubilee amungdang tarutsü kaketshirtem dangar dang meshimetsü mesüi kaketshir inyakyim ajak achayanga aotsü asoshi asenoki ali ka bushia alir ki ka yangluti ta pangjemtepa liasü aser iba jubilee muner küm 26 buba nung ayaokdang ali bushiba committee ka tenteta iba kimong alia kibong ana alitsü asoshi ki ka sütsü, ta Limatangti Lemtur, Convenor, AKTD Building Construction Committee ajanga ashi.

Tsüngrem lenisüba kübok Pa dang tashi meshir teka amteper Dimapur yimti nung kaketshir len anir aotsü imla atar, ta paisa ashi. Iba sentong nung AKTD Kimen, K. Nuken Jamir-i tepela o jembidang, Tsüngremi iba anogo moatsüba aser iba tashi Pai ajungketba asoshi kü temolungjang taroktiba nungi Tsüngrem nem tenüngsang agütsür, ta ashi. Sentong nung kaketshir tenüng nung AKTD Tir, Tamsukaba Aier-i jembidang, AKTD nung taoba lenirtem bilemteta aser menungra bilemba lemsatepa liasü.

Tanü yanglua aliba ki amendaktsü asoshi 2001 küm floor mezüngbuba yanglua liasü aser küm ishika lir March 18, 2022 anepdang kisü tenzüksü asoshi sarasadem sentong ka agia March 20, 2022 nü nungi kisüba maparen tenzü, ta pai ashi.

Iba AKTD ki semzükba sentong nung menden Imtinaro T. Longkumer liasü aser ki meshiteta Dimapur Ao Baptist Arogo (DABA) indang Pastor, I. Wati-i sarasademsü aser sentong tembanga DABA Associate Pastor, Rev. Dr. Lima Jamir-i sarasadema liasü.

Iba ki yanglutsü asoshi Committee mezüng senden amendang AKTD kimen-i 'tamang nung ki asü tenzükti' ta ayongzük arudang pai medemertem aser metettepa alirtem ajungadang pa agitsü ama teyari meshidenba ajanga iba ki yangertetogo, ta Limatangti Lemtur-i tetushi agütsü.

Iba sentong temer tarur ajak AKTD kimen ajanga chiyongdakja liasü. Iba AKTD ki nung tejenba floor densema floor pezü lir, kong kibong trok (takdang asem-sem) sadem-sadema litettsü aser meeting hall ka den, office ka, sorochiokba aser metzü meshiba tesemtem keta lir.

Iba ki yanglutsü atema tangateter aser temeimer tem nungi sen lakh 70 shi bendena liasü aser sen lakh 80 shi indoka

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
 NAGALAND: KOHIMA

No. DET-7/116/2013 Dated Kohima, the March, 2023

ADVERTISEMENT

First International Job Fair to be organized by NSDC International
 Under the Ministry of Skill Development & Entrepreneurship (MSDE) Govt. of India

Job Openings: Overseas employment in USA, Canada, UK, Europe, GCC, Western & South Asia, Japan, Australia, New Zealand, East & South East Asia.

Registration Open till 9th April 2023.
 Interested aspirants are requested to register themselves in the below links.
<http://kaushalmahotsav.nsdcdigital.org/International/Candidate/>

Major Sectors Covered				
Automotive	Drivers & Riders	Food & Beverage	HVAC	Plumbers
Agriculture & Horticulture	Electricians	Mechanics	IT	Technicians
Carpenters	Facility Manager	Health Care	Logistics	Welders
Construction	Extraction Workers	Hospitality	Oil & Gas	Retail & Service Delivery
International Cruise Liner	Refrigeration	Shipyard/Marine	Trade	

For any queries/ support please contact:
 Helpline Number- **18001239626, 08800055555** (National Skill Development Corporation International) - New Delhi

Sd/- (KOVIMEYASE)NCS
Additional Secretary
& Ex-Officio Director (HoD)

GOVERNMENT OF NAGALAND
SCHOOL EDUCATION DEPARTMENT
 NAGALAND::KOHIMA

NOTIFICATION

Kohima, dated the 24th March, 2023

No.DSE/HSS/RTI/14-1/2022 :: In pursuance of Section 5 & 9 of the Right to Information Act, 2005, the Governor of Nagaland is pleased to designate the following Officers as Appellate Authority (AA), Public Information Officer (PIO) and Assistant Public Information Officer (APIO) in respect of School Education Department as follows:

Administrative Level:

1. Appellate Authority (AA)	: Smti. Kevileno Angami Commissioner & Secretary.
2. Public Information Officer (PIO)	: Shri. Limawabang Jamir Secretary
3. Assistant Public Information Officer (APIO)	: Shri. P. James Swu Deputy Secretary

Directorate Level:

1. Appellate Authority (AA)	: Shri. Thavaseelan K. Principal Director
2. Public Information Officer (PIO)	: Shri. Razouseyi Vese Additional Director
3. Assistant Public Information Officer (APIO)	: Shri. B. Nellayappan Deputy Director

Sd/- KEVILENO ANGAMI
 Commissioner & Secretary to the Govt. of Nagaland.

Nüburtemi PM tazungba jenjang metettsü tim masü no?: Kejriwal

New Delhi, March 31 (Agencies): Gujarat High Court-i Delhi Chief Minister, Arvind Kejriwal dang pai Right to Information (RTI) Act kübok Ato kilonser, Narendra Modi indang tazungba degree kuli asüngdangba atema sen 25,000 agüjang ta tuyuba sülen Kejriwal-i, linük nüburtemi Ato kilonser tazungba jenjang metettsü tim masü no?, ta asüngdang.

Gujarat High Court indang tetuyuba lensatepa Aam Aadmi Party (AAP) leniri Twitter ajanga, "Linük nüburtemi pei Ato kilonser koba tashi azünger metettsü tim masü no? Court nung pa degree sayutsü atema pai sashia anema nokdak. Kechiba? Aser pa indang degree metettsü ahangertem dang senchi achir? Ya kechi ataloker," ta asüngdang.

AAP tongti lenir Kejriwal-isa, "Mazungba mesüra tera dang azungba Ato kilonser kaji linük atema lendong tulu," ta metetdaksü.

2016 küm Chief Information Commissioner (CIC)-i Gujarat University dang Right to Information (RTI) Act kübok Ato kilonser Narendra Modi indang MA degree sayuang, ta tuyua liasü, saka Hokolbarnü Gujarat High Court-i ibaji agientsüogo.

Gujarat High Court-isa Delhi Chief Minister dang taruba hopta pezü tsüngda Gujarat State Legal Services Authority nem sen 25,000 agüjang, ta tuyu.

CIC-i Arvind Kejriwal nem Modi indang MA degree kuli agüjang, ta tuyuba sülen Gujarat University-i, iba ya RTI tim masüba nung amshiba lir, ta shia Gujarat University-i CIC tetuyuba anema ken o benoka liasü.



March 31, 2023 nü Shimla nung rürjep alaba sülen nisungtem senzüba noksa nung angur. Kinnaur, Lahaul & Spiti, Chamba, Kangra aser Shimla district tem nung maneni rürjep alatsü aser tesem kar nungbo tzunglu arutsü asadangtetogo.

Indore lendong nung asürtem indang temang shilem tenla agütsü

Indore, Metsüremi/March 31 (Agencies): Brihostibarnü Indore yimti nung aliba tekülem ki ka nung atem chirepba lendong nung asürtem kibong 8-i par kibong züngsem asürtem temang shilem balala tenla agütsüogo.

Brihostibarnü Hindu nung tekülem ki ka nung tzübo nembangba atem chirepba lendong nungji nisung 36 asü.

Kibong 8 jagi par kinünger asürtem indang teküp aser tenük tenla agütsü telemtetba agiogo, ta voluntary organisation Muskan Group-i metetdaksü.

Muskan Group nungi Sandipan Arya-i, "Asür kibongtem den jembiba sülen onoki doctor tem aser ketdangsertem den tongtepratepa liasü. Mangyimba kibongtem jagi par kinünger asürtem temang shilem agütsütsü melungogo," ta metetdaksü.

"Tang tashi nung asür 8- Indra Kumar, Bhumika Khanchandani, Jayanti Bai, Daksh Patel, Laxmi Patel, chirepba nisung aika asü.

Bharati Kukreja, Indar Chandki aser Kanak Patel nung kibongtemi tenük aser teküp tenla agütsütsü atema tezüluba nung agütsüogo," ta pai metetdaksü.

Asürtem indang tenükji MY hospital aser Sankara Eye Bank nem agütsüogo aser asürtem teküpi Choithram Hospital nem agütsüogo, ta Arya-i metetdaksü.

Osangbenertem den jembidang Indore nung Additional District Magistrate, Ajaydeo Sharma-i, "Temang shilem tenlaba tsütsü inyakba organization- Muskan Group-i temepishiba ka agütsü liasü. Aji oda district administration-i yaria parnok nem temelaba agütsü," ta metetdaksü.

Indore yimti kübok Patel Nagar nung küm 40 tejaklen süklep (feet) 20x20 tasazük tzübo ka nembangba sülen idakji tekülem ki yanglua liasü aser Brihostibarnü Hindu nung benjung ka amongba mapang nung tzübo nembangbaji chirepba nisung aika asü.

Haryana state nung jabaso meyariba agi tsürabur ana soseta asü



New Delhi, Metsüremi/March 31 (Agencies): March 29, 2023 aonung Haryana state nung tantsür-tambur apuani kati soseta asüba shidi ka zülua toktsür 'sulphas' mozü aika chir süogo.

Apuani na jagi shidi nungji yamai zülua liasü, par jabaso ka rongsen sen crore 30 shi lir, ajisüaka pai tena mesütsü memelungi liasü.

Arrshi küm 78, Jagdish Chandra Arya aser pa kinüngtsü arrshi küm 77, Bhagli Devi na tasü mangji Charkhi Dadri yimti kübok Badhra jila nung aliba Shiv Colony nung par kidang angu.

Tenati phone ajanga police control room dangi call süa police nem iba osangji metetdaksüba sülen tekaraba nung miim mozüji achi.

Soseta asüba shidi nungji Jagdish Chandra Arya-i, "Ozü jabaso kiojen rongsen sen crore 30 shi lir, ajisüaka pai kinüngtsü küna nem anogo shia anaben-a chiyungdaksütsü memelunger," ta zülua lir.

Arya-isa, "Kinüngtsü küna Badhra nung ozü jabaso, Mahender den külemi lia aruogo, ajisüaka küm trok tejaklen pa süadokba sülenbo tena jabaso kinüngtsü, Neelam den lia aru. Ajisüaka tesülenbo lai küna meindokba ajanga küna old-age home ka nung küm 2 shi ali," ta zülua lir.

Tesüsa tena ano par jabaso takar ka den alitsü atema ao, ajisüaka par kidangji tena nem chiyungtsü teraksa/tashih dang agütsü.

"Kü kinüngtsü 'paralyse' süadok aser jabaso Virender den külemi ali, ajisüaka pai chiyungtsü teraksa dang agütsü, anungji künati soseta asütsü telemtetba agi," ta Arya-i shidi nungji shia lir.

Arya-isa, par jabaso, Virender den jabaso ana kinüngtsütem majungba agi tenati soseta asür, ta metetdaksü.

Arya-isa, pa tenü nung aliba kiojen ajakji Badhra nung aliba Arya Samaj nem tenla agüjang aser kinüngtsü tena dang mejungi beshiba kibong züngsemtem nem temerenshi agütsütsüla, ta shidi nungji mepishia lir.

Virender-ibo, par tsüraburtem shirangba agi timtema liasü, ibayongji tenati soseta asü ta ashi, ajisüaka police-i soseta asüba shidi nung tetshia alirtem anema ken o ka benokba sülen bushisingdang tenzüko.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

RONGCHII 01, 2023

Mozümora lartem kümzüktsüla

Tang Zunheboto police-temi Dimapur nung aluagi mozü ayoker ka pua yur par meyong mozü ayokdak shibanga toktsübaji asenok ajak atema Nagaland nung lanurtem tepsettsü tsükchir arua aliba meteta arrsangoktsüba mapa ka asütsü. Zunheboto police-i shibanga yutsüba mozü ayokdak nungjagi ozüngi memelaba mozü Spasmo Proxyvon (SP) capsules aser aket mozü-tem shibelenä bener tua Zunheboto nung ayokba putetba sülen police-temi tamachitsü mozü ayokba mapatem nokdangtsü asoshi arrsangokja mapa tenzükogo. Atangji, asenok aika asoshi iba osang ya taoksatsü osang kabo masütsüa akok, kechiyong asen lima nung ozüngi memelaba mozümora ayokba aser achiba ya mapa tasen kabo masü. Asenok asoshibo mozü ayokdak Pharmacy nung ozüngi memelaba SP capsules aser aket mozü ayokbajibo ,joko, chiyongtsü tajung ka ayoker aser achir amai aikati bilemer. Ashiko, iba ama mapa nungji tajangzük aliba agi taolen tesem ajak nung raktepa pharmacy lapoker südi, kechiyong tanü asüngbo jangotsü ayokba dokan dang nungibo mozü ayokba dokan-ang teimba amato angur. Ajisüaka, item tebilemstüjibo tilaka danga ta asütsüa tanü asen lima nung tamachitsü mozü SP capsules aser aket mozü dang nungi tesashiba ayoker aser achir. Item mozütem rongnung tanü lanurtemi kanga sapua achibaji 'Sunflower' am (powder) ya lir. Sunflower ta asüba ya tamachitsü mozü tesashi 'Heroin' nung tanga mozü dena meyoktepa yanglur jenjang dalangba kümer ayokba tamachitsü mozü ka lir. Ano, tanü asen lanurtem taküm raksadaksüba tsükchir mozü kaji 'World is Yours' (WY) süngjang ya lir. Aji oda, tangarbo mozü agi aneper saka asenokbo mozü agi tashidak küma achir. Iba tebilemstü yagi nisung aika mozü lar kümer yiraa senzüdagi aser kibong aika shisabolu khuret tulu agi nembanger lir. Ano, Naga nung asoshisa tia makatsüji election nung lanurtemi sen, yi aser drugs bushir aser item ajakji talubosa angur. Aji oda, tawa agiba election nunga nisung karbo anogo nung SF mozü sen meyrirjang pungo jenjang achiba osang angashiogo. Iba amaji nisung kati anogo nung mozü meyrirjang pungo jenjang chira, pa mesüra la asoshi ita nung tangarbo nungdak maden mozü achitsü kisüng sen lakh ka ser meyrirjang tenem nungdaksü. Aji oda, nisung kati anogo nung mozü sen 500 indang danga achi nunga ita nung sen meyrirjang ter pungobo nungdaksü. Election-bo temogo, saka mozü achirbo teimba kümogo. Joko, chibadokerji election-a liang teli, mozübosa bushia achitsü, anungji sen angulen melira auyatsü aser ayudaka makara, koda masüji, joko rakzükratemtsü, nisung tepsettsü ta nisung agi mojing küma aotsü. Tanü asenok lanurtem iba Sunflower aser World is Yours lima nung alir aika kümogo. Item jagi o tanep aser tajung jembir. Parnokji Tsüngrem temetet aser awashi temetet ama sayur. Parnok karibo kanga sarasademer aser mejangdanga Laishiba nung tokolak metalokerang mejanger. Parnok lanurtem karibo tenla kidanga shilem tajung agir. Yi ajembo menemer aser yi agi meseppabo meteter saka tamachitsü mozü chir senzüba yabo memenemer aser memetetter. Karbo mozü chir külenang mapaa tekümdangba inyaker saka parnokji aaba agi mozü achitsüa meperir. Iba tebilemstü ya tebang agi ashitsübo makoker, tajururtemi dang meteta lir. Tanü Nagaland nung asenok ya tsükchir aika den külemi raratsüsa tongpang ayongzüka lir. Item tongpang rongnung Ochimashi, Yi aser Tamachitsü mozümora anema raraba tongpangtem ya asütsü aser item tongpangtem rongnunga tesashitiba tongpangji tamachitsü mozümora achiba anema raraba tongpang ya asütsü. Iba tongpang ya police-tem kijaibo makoktsü, anungji asenok ajaki kanga temulung agüja shilem agitsüla. Iba mozümora achiba anema raraba tongpang nung rarayim ana lir, kaji mozü ayokba nokdangtsü aser ano kaji mozü achirtem tanaben taküm tajung dangi shilangdakja yaritsü. Item rarayim anaprongla nungji yimten, lokti aser arogo ajaki shilem tajung agitetsü, anungji tang Zunheboto police-temi mulungtetter inyakba ama tesem ajaklen yimten aser loktitemia kanga temulung agüja inyaksüla aser talisa arogoi mozü achirtem temulung meyipdakja anepaluba nung shilem tajung agitsüla. Tang tashi nung Nagaland nung mozü achirtem anepaludak tesem anasemka lapoka lir aser item tesemtem nungji taküm melenshiner lanurtem masemer. Iba ama tensa taji angateta, arogo kari danga 'Rehabilitation Cum Skill Training Center' kar lapoktet nungbo, asen chir mozülaritem aika taküm aser tanüla kümzükttela.

OLEMSABANG

'Yimsüsür' ya ojang ana agi atongtepba nungja ka lir. 'Yim' aser 'Süsür'

Bendang Imsong , Social Activist

Yim tetezü yimertem/ yimkong. Aser Süsür tetezü akumasünger asürtem mesüra tanükertem. Anungji 'susur' tetezü yimkong achaayanga, akepasünga anüker telok dang ajar.

Süsür ta asüba ya walunir danga tuluba or temaba lir.

Asen tsürabur mapang Walunir dak teku nung teptsü atep saka Süsürbo terongtong nung atep. Iba tetezü walunirbo pa tenük agi ngua tsükchir den jitepa letep, saka süsürbo pei nisung kümzüktsü tsükchir tsütsü Jong melen pa terongdong tongloktsür jongni, ni lirko ta arüshirtem temedanger sür tesülen jaja, anungji teptsüjia tesülen terongtong nung atep.

Yim-süsüri yamaji yimer ajak jungdaksütsü tamasa bushiba aser tim metemdaksüi akepasünga achaayanger asütsü atema yimi shimba nübu lir.

Yim-Süsür nungja ya atamata nungja masü. Yim- Süsürtemji pei atema masü saka yimkong ajungtsü tamasa bushiba nübu asütsü pei nungja jagi akanger.

Yimsüsürtem ajaki iba tetezüji angateta yimsü asütsüla aser nüburtemia tim tashi asen neburtem anepalua kümzüka ayuba yimsüsürtem akhüm tsüba amshitsüla.

Anungji asen Aser yimsüsürtemi anir pei yimtsüng wazüka ochi nung nangri kanger aser molusongzü molungjang ama tasütait nenok lidaktsüner.

Temeshibai kin ka ajungketer süra, temeshiba nung yimden yimli bener aotsü ni nenok ayongzüker.

(TEMESHI LAI) yamai ashir

A.shin 28:2; Hosea 13:10-11; Isaia 22:2-3; Anitet 18:21.

Tsüngremi yimsüsürtem aser iba oset azünger ajak maneni maojangma AMEN.

MEI MAPANG TANURTEM DAK SHIRANG ADOKBATEM



Sunstroke:

Anü tatsük agi pudaktsüba ajanga sunstroke asütsü melamelar. Anü tatsük apudang tanur kima nung kazüdaktsüra heatstroke agi kangshitsü aser tanur temang metaa shirang aittsü.

Tepzüno:

Temang kanga tatsük akümba ajanga tepzüno amala adoktsü.

Allergy:

Tatsük mapang sun allergy aser heat allergy den külemi tanurtem dak allergy tapu balala agi kangshitsü.

Tzü ajanga menatepba tashidak:

Cholera, typhoid, jaundice, dysentery, amoebiosis, diarrhea aser ibala mesükba tashidaktem melamela menar aser item ya talisa kima nung chiyunga senzüba ajanga lir.

Chiyongtsü nung miim chisemba:

Tatsük-talem mapang chiyungtsütem nung bacteria kanga bulua adoker aser iba ya ajanga chiyungtsü nung miim chisema kangshir. Iba ya lemyiwa mapang kanga ataloker.

Merla ajanga menatepba tashidak:

Tesem balala nung tzü atsüngdendak merlatem kanga züiner aser iba jagi dengue, malaria aser merla agi metepba ajanga tashidaktem adokdaksür.

Poliovirus:

Iba tashidak ya tatsük mapang anguba virus ajanga adoker. Poliovirus agi shiranger tanurtemji terok nung timtem adoktsü aser temang meta-a shirangtsü. Iba sülen anogo ishika lir meningitis mesüra paralysis agi kangshitsü.

Meiwa mapang tanurtem tashidak nungi noktangtsü tasa kar:

- # Lenmang nung süngjanglijang mesüra chiyungtsü tapu balala ayokba mechidaksütsüla. Tanur nem totzü nung asangba chiyungtsütem mechidaksü tajungba. Süngjanglijang, aonsotsü aser süngjang nungi agizükba tzütem peria chia-jemdaksütsüla.
- # Tanurtem tzü peria ajemtsü ajungshitsüla. Tzü tajung aser mesen maliba tzü jemdaksütsüla.
- # Kima-yimdong nung senzüdang tzü peria bener senzüla aser mapang shia tanur nem jemdaksütsüla.
- # Tasen tzü, narkol tzü aser ibala mesükba tzütem ajanga temang nung tzü talila kümduksür. Iba tzü ya tanur nem peria jemdaksütsüla.
- # Tanur nem süoshi tepungba aser loose fitting clothes semdaksütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uttar Pradesh nung pastor den kinüngtsü na jail nungi chiok



Pastor Santosh John aser pa kinüngtsü, Jiji John na noksa nung angur.

March 31, 2023: Ita ka shi tejaklen Uttar Pradesh state nung Protestant pastor ka aser pa kinüngtsü na pua jail nung puoka liasü saka anogo ishika tejaklen chiokogo.

March 29, 2023 nü osangbener den jembidang pastor atema okatsür lawyer kati, "Pastor John aser pa kinüngtsü na nem bail agütsüba sülen March 27 nü chiokogo. Tenati tashiyim amshia tangartem Khristan yimsü dangi meyipdaksür, ta tai tonglojka liasü saka District court kati tena anema kuli mali, ta obendang agüja liasü," ta metetdaksü.

Uttar Pradesh nung Bajrang Dal teloki, Pastor Santosh John aser pa kinüngtsü, Jiji John nati tangar Khristan yimsü dangi meyipdaksür, ta tai tongloksüba sülen February 26, 2023 nü police-i tenaprongla pua liasü.

Court nung Pastor pusema jembitsür lawyer-isa, "Hindu

telok jagi tena anema kuli tejangja magütsütet. Uttar Pradesh kübok Ghaziabad district nung tena leniba nung tekülem sentong tagidak mapang nung tena pua liasü," ta metetdaksü.

"Pastor aser pa kinüngtsü nati T-shirts aser pamphlets kar lema agütsü aser tena meyong kidang tekülem sentong ayongzuka agi. Ibaji ajanga tangartem kangashia yimsü meyipdaksür, ta kuli masayur," ta court-i obendang agüja pastor o kinüngtsü na chioktsü lemteta liasü.

Pastor o kinüngtsü na bail nung chioktsü atema yaritepla, Minakshi Singh-i, iba ya India nung lendong melamela adokba state nung tamangba yimsü balala tsüngda tesünap raksatsütsü nükjidong nung telok kari inyakba lir, ta metetdaksü.

Singh-isa, "Ajisüaka tesüsabo ochii takok nguogo," ta ashi. Singh ya charity telok-

Unity in Compassion nung general secretary inyaker.

Nütsüng million 200 aliba Uttar Pradesh state nung nütsüng shilem 0.18 dang Khristantem lir. 2020 küm November ita nung Uttar Pradesh nung anti-conversion ozüing tesashi benokba sülen iba ozüing kübok küm ka kija nung ken o 108 benoka liasü.

Singh-i, "Pastor John aser pa kinüngtsü nati aibelen kecha masü saka jail nung puok. Administration aser Bajrang Dal teloki rongshiba agi police-i tena aputsüsa akümba ama reprangteter. Parnoki kechiba kuli kecha makai pastor aser kinüngtsü na apu?," ta ashi.

United Christian Forum (UCF) report ajanga ashiba agi, 2022 küm Uttar Pradesh nung Khristantem anema inyakba tatalokba 149 liasü aser anti-conversion ozüing kübok Khristantem anema ken o 38 benoka liasü.

Khristantem reshikangshiba report atema sorkari mapang meshisem

March 31, 2023: India nung Khristantem reshikangshiba report bendentsü atema Centre sorkari Supreme Court dang mapang meshisemba ama court-i mapang agütsüsemogo.

March 29 nü temepishiba ken o ka angadanga mapang nung Supreme Court-i Centre sorkar nem ano mapang tali agütsüsemogo aser April 14 nü maneni ken o angadangtsü.

Supreme Court dang India nung Khristan putirtem aser Khristan rejutem anema inyakba nokdangtsü atema sorkar nem tetuyuba agüjang, ta temepishiba ken o agüja lir.

2021 küm Bangalore nung tongti putir, Peter Machado den National Solidarity Forum aser Evangelical Fellowship of India (EFI) senteper Supreme Court dang India nung Khristantem reshikangshiba nokdangtsü atema tetuyuba agüjang, ta temepishiba ken o agüja liasü.

Supreme Court Chief Justice, D Y Chandrachud-i

aniba bench-i sorkari agütsüba temepishiba ken o angadanga sülen sorkar nem ano mapang tali agütsü.

Yaküm September 1 nü state 8 (BJP-i yimsüsüba state teimbaka) dang Khristantem anema inyakba tatalokbatem nung police report, bushisüngdanga, aibelener apuba aser courts nung ken o benoka aliba osang tejangja bendenba sülen Centre sorkar nem item reports agüjang, aser Centre-i report ji Supreme Court nem agüjang, ta tetuyuba agüja liasü.

Temepishiba ken o benokertem atema jembitsür lawyer, Colin Gonsalves-i Supreme Court dang, "Onoki iba ken o benokba mapang nung, Khristantem anema inyakba tatishitsü kar metetdaksüba ajanga item tatalokba ajema akümtsü ta onoki imlaa liasü, ajisüaka tang linük tesem ajaklen Khristantem anema inyakba

kanga bulua kümogo," ta ashi.

Temepishiba ken o agütsürtemi United Christian Forum (UCF) report nung ajemdaker, 2022 küm India nung Khristantem anema inyakba tatalokba 597 liasü, ta court nem metetdaksü.

Tamalen osangbenertem den jembidang temepishiba ken o agütsürtem rongnung A.C Michael-i, "Onoki temepishiba ken o agütsüba shidi nungji state 22 nung Khristantem anema inyakba osang tejangja shia lir. Ajisüaka Supreme Court-i state ti- Bihar, Haryana, Chhattisgarh, Jharkhand, Odisha, Karnataka, Madhya Pradesh aser Uttar Pradesh dang ang Khristantem anema inyakba osang agüjang ta tuyuogo," ta metetdakja liasü.

Nütsüng billion 1.3 aliba linük nung Khristantembo nütsüng shilem 2.3 dang lir aser Hindu nung nütsüngbo shilem 80 dak tema lir.

ANOGO ABEN TSÜNGREM DEN

Teti Katet - T. Ken. 78:9-20

T.ken 78 nung Ephraimi Kibuba tezüngzüktepba mayu nung parnok teyari kanga nüngdakba mapang nung Israeli parnok meyariba ashir. Ephraim christan, lijak agi raratsü renemer, tongpang anogo nung meyipa ao. Tsüngrem tezüngzüktepba parnoki mayu, aser Pa ozüing nung mejajanü. Aser parnoki Pai inyakbatem, aser Pai parnok dang sayuba sayatenyatem, amadok. (t.9-11)

Kodang nüburtemi tongpang rara nung tamakok ngudir koda lendong. Yisui asenok shirnoki tesülen meyipa repranger aser Tsüngrem mulungba mataloktsür iba asoshi tekümdangtsü agütsür.(LK 9:62). Asenoki tesülen repranga, asenok tejaklen ali tusaa aotsü makok. Aser asenoki tesülen meyipa repranga, asenoki raratsü tim tashi meraratetsü. Au, idakji tanelaren rara odaki, aser asenok ajak sepoy asütsü nüngdak saka iba rara nung tongpang nung raratem den langka tai lir. Parnok tamang katetbatem masü, parnoki raraba anogo nung meyipa arur.

Parnok jajaba nung langka tai lir. "Parnoki Tsüngrem tezüngzüktepba mayu, aser Pa ozüing nung mejaja" (t.10). teti tamakok tenzükdakji aji lir. Parnoki tongpang rara nungji takok angutsü asoshi Tsüngremi parnok yari, saka parnoki tashi manga.

Tatema, Tsüngremi parnok asoshi inyakba parnoki amadok. "Aser parnoki Pai inyakbatem, aser Pai parnok dang sayatenyatem sayuba amadok"(t.11). Nai sayatenya ka amadoktetsü ta bilemer asü? Tanü Tsüngremi ne dang sayatenya ka inyakra Pai na kidangi maja tashi nai iba indangji jembitsü. Ephraim nung rara nung temulung alemtsü mali asü kechiaser Tsüngremi parnok asoshi inyakba parnoki amadok. Tsüngrem ozüing anema aküm, aser parnoki Kibuba mapatem nungi meyip. Parnoki Pa mapa nung yaritsü mokoki aküm.

Tamang makatetbaji meimchir ajak dak aketba ka lir. Saka Tsüngrem yamaji masü. Tamang katetbaji Pa jakla nung shilem ka lir. Nai Kibuba metetta lira iba jaki na tasü itdaksütsü. Pa mapatem bilemtetettang aser Pa asoshi tongpang rara tamang katetba sepoy ka süang.

Thailand nung ketdangsertemi China nung Khristan 63 puogo



Yaküm September ita nung China nung aliba Shenzhen Holy Reformed Church nungi züngsemtemi Thailand yimtiba, Bangkok nung aliba United Nations refugee office nung refugee jenjang meshia temepishiba agütsüba sülen tangokba noksa nung angur.

March 31, 2023: Pastor, Pan Yongguang Brihostibarnü Thailand nung immigration officials-i Chinese house church ka nung züngsemtem apu; tyküm August ita nungi tenzuka China nung Khristantem jagi United States nung jenoka alitsü atema meranger.

Thailand ketdangsertemi tanur 35 densema Khristan 63 puogo, aser parnokji China-i tanaben meyipa yokra jail nung puoktsüa akok.

Shenzhen Holy Reformed Church nungi züngsemtem jagi 2019 küm China toktsür ajen aser mapang tatsüka South Korea nung aliba sülen Thailand-i arua linük yimtiba, Bangkok nung aliba UN refugee office nung refugee jenjang atema temepishiba agüja liasü.

Pastor, Pan Yongguang leniba nung Khristantemji anogo ishika atsüka liasü, iba sülen hotel-i tanaben meyipa aru. Brihostibarnü 11:00 ako meta Thai immigration police 20 shi hotel jagi aruba sülen parnok indang passports aser visas mita reprangdang nung itemji yaküm October ita nung 'expire' sür liasü.

Kasa anogo nungjisa nikongdang 2:00 ako meta Khristantemji Immigration center kati anir ao.

Ketdangsertemi Pastor Pan Yongguang den Khristantem dang asüngdangyaba sülen anasa aliba police station kati anir ogo.

Pastor Pan den pai aniba züngsemtemji China-i tanaben meyipa yokra parnok ajak jail nung puoktsüa akok.

**AO OSHI ANGAZÜKDAK:
TANÜ ANGAZÜKTSÜBA OJANG**



Piya

(n) chi agi yangluba yijok (dregs of rice beer)
* Piya achiba agia meseper.

Piyang

(n) ango aputsü atema tzü temdangba tongti süng (main beam used for fishing dam)
* Ayong temdanga ango aputsü atema piyang asütsü süng takang aser talang nüngdaker.

OLONG PAITEP # 6474

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Tekolok meshitak
- 3. Tachitsü tajung
- 7. Ajak dak atongba wara
- 8. Pei / Tebanger
- 9. Amena
- 10. Tain maküm
- 11. Akhi mapang indang
- 13. Lenmang ajurutepdak
- 15. Medemer tsungda jatepba
- 16. Tebilemtsü
- 17. Te _ _ _ _ ra

LANGTSÜNGLEN

- 1. Yim tulu
- 2. Menden nung anisüngzük
- 4. Tarutsü indang shiteterem
- 5. Talila / Alia
- 6. Te _ _ _ _ _ g
- 9. Tai jungkai adok
- 10. Medemer chijiba
- 11. Tai atok
- 12. Teimla ayu
- 14. Endokenra / Tamagitsü

OLONG PAITEP # 6473 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :


- 1. Temesen, 2. Raksa, 3. Aon,
- 4. Aso, 6. Nile, 9. Alizung,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Idagi shingo dang mesüker noksa nung angur saka iba ya shingo masü aser yamaji bilemtsüjia tim dang kechiaser iba dang ya shingo mesükba orchid narö (Monkey faced orchids) ta ajar. Iba ya Ecuador, Colombia aser Peru tenemkonglen dak alaka tanga kecha nunga mangur. Aji oda süaka, tia ajunger karibo miima bener oor atembaji mesüi akümba otsüa lir.

Table ya tasazük height nung kwi asütsü ?
Nia-a iba Ongo ya inyakdangang



Süpokrem agiba atema V&AC-i Kamalpur Lat Mandal apu



Guwahati, March 31, 2023
(Agencies): Directorate of Vigilance and Anti-Corruption, Assam-i Hokolbarnü Kamrup district nung Lat Mandal kati süpokrem meshia agidang apu. Lat Mandal ya Gitanjali Deka ta jangjaogo aser la ya Kamalpur Revenue Circle

indang circle officer office nung inyaker. Deka-i nisung ka ket nungi Rs 5000 süpokrem meshia agidang anti-corruption cell ketdangsürtemi la apu. "DIR VAC Assam telok kati Circle Officer, Kamalpur Revenue Circle, Kamrup office

nung sang ka yanglur atadang Lat Mandal Gitanjali Deka Das apu" ta IPS Surendra Kumar-i metetdaksü.

"Lai nisung ka dang land sale permission atema süpokrem meshi" ta pai ashi.

March 22, 2023 nü Directorate of Vigilance and Anti-Corruption ketdangsürtemisa Sonitpur district kübok Thelamara Revenue Circle nung Lat Mandal la apu.

Iba Lat Mandal ya Parag Borah ta jangjaogo aser pa ya Circle Officer, Thelamara Revenue Circle office nung inyaka liasü.

Borah-i nisung ka ket nungi Rs 15,000 süpokrem meshia agidang apu ta vigilance team-i metetdaksü.

Manipur nung revenue ketdangsür 9 mapa nungi anentsü

Imphal, March 31, 2023
(Agencies): Manipur state indang revenue department nung ketdangsür 9-i land records nung tim mesüi teka aiba atema mapa nungi anentsüogo ta Manipur Chief Minister N Biren Singh-i metetdaksü.

Hassan, Mandol, T Hemjit Singh, Mandol, O Munal Singh, Retd. Mandol aser Md Jahangir, Retd Mandol nunger lir.

CM Biren-isa osangbener senden nung ozüing alema ali belenba, forest & government li atema patta agütsüba, Thoubal nung Indian Made Foreign Liquor (IMFL) yangluba aser Kongba Maru Laiphamlen hill range nung morok mi aoba onüktem lemsatep.

Thoubal district nung Indian Made Foreign Liquor (IMFL) yangluba atema Khongjom Police telok kati Thokchom Bobo Singh'er ki mita ao. Indangji IMFL yangludang

amshibatem angu aser iba ken o atema nisung asem puogo, ta Biren-i ashi.

Par asemji Thokchom Bobo Singh, Thokchom (O) Bino Devi aser Thokchom (O) Achoubi Devi nunger ta jangjaogo.

Külen, Kongba Maru indang hill range nung mi senoktsüba atema nisung asem puogo aser parnok anema ken o tem benokogo, ta paisa ashi.

Iba sentong nung Information and Public Relations Minister Dr. Sapam Ranjan, Education Minister Th. Basanta Kumar, Secretary (Revenue) Namojjam Kheda Varta aser tanga ketdangsürtem aden.

Meghalaya Congress lenisüba memelenshitsu: RV Lyngdoh

Shillong, March 31, 2023
(Agencies): Meghalaya Assembly election nung tajung tajung mengutetba atema lennirtem memelentsü ta Congress Legislature Party (CLP) leader Ronnie V Lyngdoh-i ashi.

tamakok anguba atema nisung ka dak dang tai matongtsüla aser aji tim masü" ta Lyngdoh-i langzü.

Congress-i menden 59 nung toktepba nungi 5 nung dang takok ngua liasü.

Meghalaya nung Congress-i tamakok angubaji tanga onüktem ajanga lir. Ano 2023 election jakdang Congress MLA 17-i party toktsüba ajanga party

indang votes lemsa, ta paisa ashi.

Assembly election nung tamakok nguaka Congress-i autonomous district council (ADC) elections aser Lok Sabha election atema renemdar, ta Lyngdoh-isa metetdaksü.

Meghalaya nung Congress-i constituency, block committee aser primary unit ajak nung jungjunga renema lir, ta paisa shisem.

Assam DGP-i DSP Lovlina Borgohain nem tenüngsang agütsü



Guwahati, March 31, 2023
(Agencies): Assam director general of police (DGP) GP Singh-i Hokolbarnü Lovlina Borgohain nem tenüngsang agütsüogo.

gold medal nguteta liasü. La ya Assam nung deputy superintendent of police (DSP) lir.

Guwahati nung aliba Assam police headquarters nung DGP-i Lovlina nem tenüngsang agütsüba sentong agia liasü.

"Assam police headquarters

nung Lovlina Borgohain nem tenüngsang agütsüogo, Lar tsurabur dena ajurutepa sensaksemogo" ta Assam DGP GP Singh-i metetdaksü.

March 26, 2023 nü Assam tsür aser Olympic medalist Lovlina Borgohain-i India atema gold medal ka nguteta liasü.

Lovlina-i women's world boxing championship nung seret 75 telemsa nung takok angu. Lai Australia tsür Caitlin Parker madak takok nguteta liasü.

2018 aser 2019 nung lai women's world boxing championship nung bronze dang nguteta liasü saka takumbo gold nguogo.

New York nung Trump dak tai tongloktsüogo

New York, Metsüremi/March 31 (Agencies): 2016 tir election agitsü lia 'porn star' ka nem miima sen agitsü ta tai tonglokja New York nung ken o ka bushiba dak sendakba nung taoba United States tir Donald Trump dak tai tongloktsüogo.

Hopta aika jembia aruba sülen New York grand jury kati Trump dak tai tongloktsüta vote agitsü, ta Manhattan District Attorney indang office ajanga ashi, anungji US puti otsü nung taoba tir ka anema ken o benokba rongnung pa mezüngbuba akumer.

Tai tongloktsüba ya tejangiabo memetet aser iba osang anogo ishika tsüngta sangdongtsü amai lir. Manhattan District Attorney Alvin Bragg indang office ajanga sangdong ka nung ashiba agi, pa bendanga agitsütsü asoshi prosecutor temi Trump indang

lawyer tem den inyakteper.

Tang atemabo iba ken o temai madoki atatsü, ta ashi. "Okadak nokdaktsü anogo shimtetba sülen nungdakba osang sangdongtsü," ta district attorney indang office odongtar ka ajanga ashi.

Pa indang 2024 presidential campaign ka ajanga sangdong ka agitsüba nung Trump-i pa dak tai tongloktsüba ya puti otsü nung tematiba jenjang nung yimtenren tsütsü temerenshi aser election nung teka amoshiba ka lir, ta ashi.

Iba ken o ya pa anema "witch hunt" inyakba nung shilem ka lir aser pai khenyongi tai maka, ta ashir.

Taoba tir ya 2016 campaign mapang taoba mapang Trump indang personal lawyer aser fixer, Michael Cohen-i porn star Stormy Daniels nem sen

\$130,000 agitsü ta tai tonglokja ken o bushisingdang tenzüik.

Daniels tenüing chichibabo Stephanie Clifford lir aser laia 2006 küm tetenzüklen Trump den medema liasü, ta shia lir. Trump totuyuba nung pai la nem sen ya agitsü, ta Cohen-i ashir.

Taoba tiri la den memedem ta ashir aser tiazü nung tai tongloktsüba nungi pa tenüing kumzüiktsü mechi sen ya agitsü aser pai aibelen mapa kecha meinyak, ta tekong meranga nokdaker.

Trump-i sen agitsüba ya campaign donation atema ta jangjatet nunga election ozüngtem nung aibelener asitsü, kechiaser political candidate tem nung nisung shiai sen \$2,700 dang agitsütettsü aser itemjia yimjak nung sangdongtsü shia lir. Trump-i ita tetenzüklen iba

ken o nung pa aputsü akok ta shia liasü. Pa taruba hopta tetenzüklen New York nung Manhattan District Attorney's Office matsüngdang bendanga agitsüba mapang pa meyongnem agizüktsü (fingerprinted) aser noksa tangoktsü imlar, ta ashir.

Trump-i social media post balala nung pa bukumer dang longkak aittsü ajungshi, anungji rongrongshirong adoktsü akok ta bilema liasü, kechiaser Trump bukumer temi January 6, 2021 nü US Capitol sapanga liasü.

Pai legal defence atema sen tali agitsütsü ayongzüik, anungji March 18 nungi tenzüka sen million \$2 dak tema bendenogo ta par teloki ashir.

Republicans temi iba atema aitsüogo aser dangar aikati ama House Speaker Kevin McCarthy-ia iba ya tzüzüing-ozüing inyakyim nung nok-nü agitsüba amai lir, ta ashi saka Democrats temibo Trump-i mapa tamajung inyakba

agi pa menerper, ta shia liasü.

Brehostibarnü osang yagi Daniels-a benjonga liasü aser Twitter nung la bukumer tem dang pelaba lemsatep.

Iba osang sangdongba sülen Republican party temi Trump bukuma jembia aser par jabaso Eric Trump-ia iba ya "third world prosecutorial misconduct" ka lir ta shia liasü.

Florida Governor Ron DeSantis, shibai 2024 nung Republican nomination atema Trump den tokteptsü imla lir, paisa iba ya "un-American" lir, ta ashi.

Trump-i 2024 küm US tir asoshi tanaben tokteptsü sentong aliba sangdongogo aser tang pa dak tai tonglokja ken o benokba agi pa mesoittsü.

Trump dak tai tongloktsüba osang pela agizüka Democrats temi nisung shinga ozüing dang temaba mali, ta yimyim ka ayimoktsü.

GOVERNMENT OF NAGALAND DIRECTORATE OF HEALTH & FAMILY WELFARE NAGALAND :: KOHIMA

No. DHFW-5/Trg/PG (Dental)/2008-09/ / Dated, Kohima the th March' 2023.

ADVERTISEMENT

Applications are invited for sponsored candidate(s) from Nagaland (preference will be given to in-service doctors) to undergo 3 (three) years Post- Graduate course in **MDS "Periodontics"** for the academic session 2023-24 at Regional Dental College, Guwahati.

- Criteria :

1. Candidates should be domicile of Nagaland State.
2. Candidate should be qualified in the **NEET-MDS-2023**.
3. If the 1st Candidate refuses to join the course for any reason, he/she should surrender the seat in writing. In that case, the offer of the seat will go to the next waiting list candidate.
4. **No. of seat - 1 (one).**

Interested candidates may apply to the undersigned, DHFW-5 (Training Section) on or before 11th April 2023.

SD/- DR. VIBITUONUO M SACHU
Principal Director,
Directorate of Health & Family Welfare,
Nagaland: Kohima.

Office of the Ungma Yimlang Jamir Kidong

PELABA LEMSATEPER

Ozü kinunger nungi Dr. Watizülu Jamir nem menden tajung (Chairman DAN) agitsü nung Ungma Yimlang Jamir kidongi asen lenirtem, Shri. Neiphu Rio Chief Minister, Shri. Chingwang Konyak President NDPP aser Shri. Sharingain Longkumer Speaker NLA dang pelaba lemsateper. Menden tajung ngutetba asoshi tenüngsang agitsüba den Tsüngremi ne wadang tali moajang ta sarasademer.



Sd/-
Onentiba Jamir, Tatar
Rarentemjen Jamir, Tatar
Takoyanger Jamir, Tatar
Takanukshi Jamir, Tatar
Nungsangmeren Jamir, Tatar
Sentitsük Jamir, Tatar

CHRISTIAN HIGHER SECONDARY SCHOOL

NYAMO LOTH ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com

We design your child's future

IN LOVE AND



We build your child's career

TRUTH WE STRIVE

ADMISSION FORMS & PROSPECTUS

FOR CLASS 11

(ARTS & COMMERCE) 2023-24

FOR BOYS & GIRLS

AVAILABLE AT THE SCHOOL OFFICE

DURING OFFICE HOUR

BETWEEN (9:00AM - 1:00 PM)

SPECIAL FEATURES



1. Qualified, Trained & Dedicated Teachers
1. Summer Bible School
2. Scripture Retreat & Counseling
3. Career Guidance Cell
4. Smart Board Classrooms
5. Hostel for Boys
6. Bus Service
7. NCC
8. Club Activities

1st NECDC Senior Mens Interstate Friendship asayamung osang



Nagaland captain Jonathan Rongsen asayaba mapang.

Dimapur, Metsüremi/March 31 (TYO): Taoba asaya nung Arunachal Pradesh madak wicket ti agi ayong-ayonga akokba sülen March 31, 2023 nü Nagaland Cricket Stadium, Dimapur nung Meghalaya-i toss akok aser mezüng batting shimteta liasü.

Tetenzüklen Meghalaya nungi Kishan Lyngdoh (37 runs) aser Arien Bonchang (55 runs) nati junga asayateta liasü, saka Manipur team nungi bowling tsütsü tashi tait asünung Meghalaya team-i runs anguba soita yutet.

Meghalaya nungi Swarajeet (11 runs), Anish Charak (17 runs), Lerry (13 runs) aser Sanvert B Kurkalang (12 runs) nungertemi runs aikabo mongutet.

Bowling tsütsü Manipur nungi Bisworjit Singh aser Kishan Laishram nati wicket asem-sem agia liasü aser Jotin Pheiroijam, Rajkumar Rex Singh aser Bikash Singh nungertemi wicket ka-ka agia Meghalaya nung over 48.3 buba nung runs 178 nguteter ajak out sütsü.

Manipur batting asüdüng wicket pezü out sür over 38.1 buba nung iba nukjiding tongteta liasü.

Manipur nungi Md Basir Rahman aser Langlonyamba napronglai runs 50 ngutet aser Kamrajit Yumnam-i runs 19 aser Longjam Ronald-i runs 11 nguteta liasü.

Asaya atemdang Md Sultan Karim-i runs pezü aser Jotin Pheiroijam-i runs 30 nguteta Manipur team ya Group A table nung tematiba jenjang ajangzüka Semi-finals atema qualify süogo, shirnoki Group B nung runner up, Sikkim den April 1, 2023 nü Nagaland Cricket Stadium nung asayatsü.

Iba asaya nung Manipur captain Langlonyamba-i runs 50 ngutetba aser asayadak lenir sempet tajung amshiba yong Man of the Match sempet agüja liasü.

Maneni kasa anogo Sovima Cricket Ground nung Nagaland aser Sikkim tsüngta asaya liasü, kong asayamung ayonger Nagaland-i toss koka mezüng bat amtsü shima liasü. Iba asaya ya moapu tai makongba ajanga overs 33 dak asayadaksü.

Nagaland captain Jonathan Rongsen-i ball 87 nungi runs 102 nguteta liasü aser asaya tatemi

Sikkim-i over 33 nungi runs 184 angutsü nungdaka liasü.

Sikkim nungi Palzor Tamang-i iba asaya nung tongtipang wicket pezü agi aser Lee Yong Lepcha-ia nngdakba wicket asem agia liasü.

Nagaland team nungi Sedezhalie Rupreo-i runs 24, Tahmeed Rahman-i runs 14 aser Hem Bahadur Chetri-i runs 13 nguteta liasü.

Sikkim team batting tenzükdang mezüng aita asayar Pankaj Rawat, Arun Chettri aser Nilesh Lamicha nungertemi runs 3, 2 aser 6 dang yanglutet.

Ajisüaka Ashish Thapa-i runs 11, Anwesh-i runs 28, Palzor Tamang-i runs 22, Lee Yong Lepcha-i runs 18 aser Ankur Malik-i runs 30 nguteta par telok teimla mesamadaksü.

Ajisüaka Nagaland nungi spinner temi Anwesh aser Palzor Tamang wicket agia liasü.

Nagaland nungi Nagaho Chishi, Tahmeed Rahman aser Jonathan Rongsen nungertemi wicket ana-na agi aser Khrievitso Kense aser Hoponkyu Sangtam nati wicket ka-ka agia liasü.

Nagaland captain Jonathan Rongsen-i runs 102 den wicket ana agitetba ajanga iba asaya nung pa nem Man of the Match agütsü.

Iba asaya nung takok anguba ajanga Nagaland ya Group B nung tematiba jenjang tongtetogo aser April 1, 2023 anepdang 8:45 ako nungi tenzüka Sovima Cricket Ground nung Meghalaya den asayatsü.

NCC inyaksangshi nung 'Best College' sempet...

(Tapak 2 nungi...)



Iba sempet agütsüba sentong ya Fazl Ali College March 31, 2023 nü agia liasü, kong Dr Wati Imchen, Principal, FAC; Col CST Swamy, Commanding Officer, 25 Naga Bn NCC;

Vinod Kumar, Vice Principal, Lt Leremongla, ANO; Dr Imliwati Longkumer, CTO; PI staff aser NCC cadets tem dena liasü.

Iba sentong nung Brig Praveen Sangwan, NCC Group Commander Kohima nungi yokba salem osang Col CST

Swamy-i zünga ashi, kong FAC indang cadets tem nung tenüngsang agütsü aser college management ajanga NCC inyakyim nung yariba asoshi pelaba lemsatepa liasü.

Dr Wati Imchen-i tir o jembiba mapang 25 Naga Bn NCC staff temi mapang shidak nung lenmang sayuba aser temolung ajak agi college yariba asoshi tepela lemsatepa liasü.

Cadets temi meranga inyakba aser Lt Leremongla-i

anibelem mesasai shisa agütsüba ajanga Nagaland nung college 17 rongnungi FAC NCC ya tajungtiba jenjang ngutet, ta paisa ashi.

'Best Performance' Trophy aser kulizüng kaket ya college principal nem Commanding Officer-i amoktsü aser Lt Leremongla nem 'Best ANO' kulizüng kaket agüja liasü.

Sentong nung Dr Imliwati Longkimer, CTO ajanga melepzüng o jembiba liasü.

IWL April 25 nü nungi asaya tenzüksü

Metsüremi/March 31, 2023 (Agencies): Indian Women's League (IWL) April 25 nü nungi tenzüka asayatsü atema India Football Federation (AIFF)-i, Hombarnü League Committee senden nung telemtetba agiogo.

AIFF-isa, team shia nung bendanger asayar asemsem aniokdaksütsü atema telemtetba agiogo. Bendanger asayar asem ya mapang ka nung ana dang asayatetsü.

Iba senden ya Lalnghinglova Hmar lenisüba nung video conferencing ajanga agia liasü.

Iba senden nung Secretary General Shaji Prabhakaran den committee züngsem M Satyanarayan, Kiran Chowgule, Reginold Varghese, Amit Chaudhuri aser Caitanno Fernandes nungertemi shilem agia liasü.

"Committee-i Indian Women's League April 25, 2023 nü nungi tenzüka asayatsü atema telemtetba agiogo," ta AIFF-i ashi.

"Hero IWL aser Hero 27th Senior Women's National Football Championships 2022-

23 na tsüngda mapa peria toktsütsü atema committee-i iba telemtetba ya agia liasü.

"Committee-isa, team shia nung bendanger asayar asemsem asayadaksütsü atema telemtetba agiogo. Bendanger asayar ya mapa ka nung ana dang asayatetsü. Club temi mepeshiba sülen iba jenjang agia liasü," ta kasa sangdong ajanga metetdaksü.

IWL nung team 16 ya telok ana küma lemsar asayatsü. Telok anaprongla nungi temaba jenjang nung tembangba team pezü knockout stage atema qualify asütsü. Asayamung nung temaba jenjang nung tembangba team ti taruba IWL season atema qualify asütsü, koba home-and-away format nung asayatsü.

Maneni committee-isa, kanga junga asadanga sülen league terenlok atema taküm IWL nung East Bengal team-a züngoksemtü atema telemtetba agiogo. IFA-i, taküm East Bengal team-a züngoksemtü atema asadangtsü asoshi mepeshia liasü.

Satwik aser Chirag nati Spain

Masters nunga junga asayatsü imlar

Metsüremi/March 31, 2023 (Agencies): Swiss Open badminton tebur tarep asaya champion Satwiksairaj Rankireddy aser Chirag Shetty nati maneni Madrid Spain Masters nung junga asayatsü merangtsü aser kasa mapang PV Sindhu aser Kidambi Srikanth nata taküm junga masayateti arua iba asayamung nung junga asayatetsü imla atadar. Iba asayamung ya Mongolbarnü nungi tenzüksü.

India nungertemi asayartem rongnungi Satwik aser Chirag nati taküm mezüngbuba takok nguogo. Deobarnü Swiss Open final nung tenati China nungertemi tarep World No. 21 Ren Xiang Yu aser Tan Qiang na 21-19 24-22 agi koka liasü.

World number 6 India nungertemi tarep asayar yagi iba super 300 title-a abentsü merangtsü aser tena mezüngbuba asaya Japan nungertemi Ayato Endo aser Yuta Takei na den asayatsü lir.

Satwik aser Chirag natibo taoba hopta Basel nung kanga junga asayaogo ajisüaka kija asayartemi junga masayatet. Kija asayartem rongnungi Sindhu-a taküm asayamung ka nung danga junga masayateti arudar aser Srikanth-a consistent süa masayateti arudar.

Second seed Sindhu, shiba

2013 küm asayamung ishika asayaba nung tanabuba round adena masayateti arudar, la mezüngbuba asaya qualifier ka den asayatsü.

Tebur kija asaya nung taoba world number one asayar Srikanth mezüngbuba asaya Thailand nungertemi asayar Sitthikom Thammasin den asayatsü aser national champion Mithun Manjunath, Malaysia nungertemi asayar Ng Tze Yong den asayatsü.

Sameer Verma aser B Sai Praneeth nata iba asayamung nung shilem agütsü. Verma Ireland nungertemi asayar Nhat Nguyen den aser Praneeth Netherlands nungertemi asayar Mark Caljouw den asayatsü.

Tetsür kija asaya nung Malvika Bansod, Denmark tsür Julie Dawall Jakobsen den asayatsü aser Aakarshi Kashyap Canada tsür Michelle Li den asayatsü. Saina Nehwal-a Thailand tsür Busanan Ongbamrunphan den mezüngbuba asaya asayatsü.

Tebur tarep asayar rongnungi MR Arjun aser Dhruv Kapila na Scotland nungertemi tarep Christopher Grimley aser Matthew Grimley na den asayatsü aser Krishna Prasad Garaga o Vishnuvardhan Goud Panjala na qualifier tarep ka den asayatsü.

BILEMDANGANG

"Temulung ken meyiper saka temelenshiji taküm tepiyong agir"